

# **AWIG - AWIG DESA ADAT GELOGOR**



**DESA : LODTUNDUH**

**KEC. : UBUD**

**KAB. DATI II GIANYAR**

PIDAGING  
 MAKA BANTANG AWIG-AWIG DESA ADAT  
 MURDHA - CITHA

SARGA I	ARAN LAN WAWIDANGAN DESA	
SARGA II	ARAN LAN WAWIDANGAN DESA	
SARGA III	ARAN LAN WAWIDANGAN DESA	
	Palet 1 Indik Krama .....	2
	Palet 2 Indik Prajuru/Dulun Desa .....	5
	Palet 3 Indik Kulkul .....	6
	Palet 4 Indik Paruman .....	7
	Palet 5 Indik Druwen Desa .....	9
	Palet 6 Indik Pamitegep .....	10
	Kaping 1 Karang, Tegal lan Carik .....	10
	Kaping 2 Papayonan .....	11
	Kaping 3 Wewangunan .....	11
	Kaping 4 Wewalungan .....	12
	Kaping 5 Bhaya .....	12
	Kaping 6 Panyanggran Banjar .....	14
SARGA IV	SUKERTA TATA AGAMA	
	Palet 1 Indik Dewa Yadnya .....	14
	Palet 2 Indik Resi Yadnya .....	17
	Palet 3 Indik Pitra Yadnya .....	18
	Palet 4 Indik Manusia Yadnya .....	23
	Palet 5 Indik Budha Yadnya .....	23
SARGA V	SUKERTA TATA PAWONGAN	
	Palet 1 Indik Pawiwahan .....	25
	Palet 2 Indik Nyapian .....	27
	Palet 3 Indik Sentana .....	28
	Palet 4 Indik Warisan .....	30
SARGA VI	WICARA LAN PAMIDANDA	
	Palet 1 Indik Indik Wicara .....	32
	Palet 2 Indik Pamidanda .....	32
SARGA VII	NGUWAH NGUWUHIN AWIG-AWIG	
SARGA VIII	P A M U P U T	

## MURDHA CITTA

AUM, OM

Om Swastyastu, Om Awighnamastu Nama Sidham,

Putusing sabha Krama Desa Adat Gelogor gumawe Awig-awig Desa Pakraman maka sepat siku-siku pamatut, wastu kasidan proyojanan mami kabeh prasama angidep mwah amagehaken kadi linging Awig-awig iki.

### SARGA I

#### ARAN LAN WAWIDANGAN DESA

Pawos 1

- (1) Desa adat puniki mewasta Desa Adat Gelogor
- (2) Jebar kakuwub wawidangannya mawates nyatur :
  - a. Sisih Wetan ring pangkung ;
  - b. Sisih Kulon ring tukad yeh was ;
  - c. Sisih Lor ring pangkung ;
  - d. Sisih Kidul ring Desa Adat Silungan ;
- (3) Desa puniki kewangun antuk karang ayahan Desa lan karang gunakaya, saking Banjar Dinas Gelogor.

### SARGA II

#### PATTIS LAN PAMIKUKUH

Pawos 2

Desa Adat Gelogor ngamanggaharg pamikukuh minakadi :

- a. Pancasila ;
- b. Undang-Undang Dasar 1945 pamekas pasal 18 ;
- c. Perda Propinsi Daerah Tingkat I Bali No. 06 Tahun 1986 ;
- d. Tri Hita Karana Manut sada cara Agama Hindu.

Pawos 3 .....

Pawos 3

Luwir Patitis Desa Adat Gelogor :

- a. Mikukuhin miwah ngrajegang Sang Hyang Agama ;
- b. Nginggilang tata Prawertine maagama ;
- c. Ngrajegang kesukertan Desa saha Pawongannya Sakala lawan Niskala.

SARGA III

SUKERTA TATA PAKRAMAN

Palet 1

Indik Krama

Pawos 4

- (1) Sang kabawos Krama Desa inggih punika kulawarga sane maagama Hindu saha ngamong karang, utawi jenek mapaumahan.
- (2) Sajaba punika sinanggeh tamiyu.

Pawos 5

Krama Desa wenten 4 petang pawos, Luwire :

- a. Krama ngarep, kulawarga sane ngamong karang, utawi manut pararem ;
- b. Krama pangempian/pengele kulawarga sane nenten ngamong karang nanging sampun mewiwaha ;
- c. Krama balu, krama sane katinggal seda olih lanang utawi istri nyane, utawi sangkaning nyapihan ;
- d. Krama tapukan, kulawarga manut saking aksara a utawi b ring ajeng sakewanten durung antes ngayah utawi salami kanton masekolah malarapan ilikita pastika sekolahannya, manut pararem.

Pawos 6

Kawit dados krama Desa :

- a. Sangkaning ngamong karang, utawi manut pararem ;
- b. Mawiwit pawiwahan ;
- c. Mawiwit paumahan/jenek ring Desa Adat Gelogor sakewanten sampun kaupeksa oleh penjuru.

Pawos 7 .....

#### Pawos 7

Panamayan tedun makrama Desa :

- a. Yering krama pangarep/penyeledii ngelantur premangkin ;
- b. Ngantos 3 sasih mawiwit pawiwahan ;
- c. Jenek mapaumah, manut pararem.

#### Pawos 8

Sahanan Krama Desa keni tategenan luwire :

- a. Ayah ngarep, mapiteges urunan ayahan mamungkul ;
- b. Ayah pangemplan, mapiteges urunan miwah ayahan memungkul ;
- c. Ayah bulu, ayah miwah urunannya manut kahanan balu inucap ;
- d. Ayah tapukan, keni urunan mamungkul, kaluputang ayah-ayahan, ngantos mayusa 17 warsa manut panurun.
- e. Prade rikalaning ngaya wenten sinalih tunggil krama matilar tanpa sadok sadereng puput karya, wenang krama inucap keni pamidanda manut pararem, tanjek laler kawastanin.

#### Pawos 9

Swadharman Krama, sewosan ring tategenan, luwire :

- a. Tinut saturut ring sadaging Awig-awig, pararem lan pawasran ;
- b. Tan maren ngutsahayang magda Desane mrasidayang nyujur manut patitis ;
- c. Tinut saturut ring Guru Wisesa ;

#### Pawos 10

Swadharman tamiyu, luwire :

- a. Tinut saturut ring yasa kertin Desane ;
- b. Tan piwal ring sadaging Awig-awig, pararem lan paswaran Desa ;
- c. Nyadokang raga ring Prajuru arahina sasampun jumenek malarapan antuk ilikita pastika ;
- d. Yan tan tinut pacang kairid (tan kadadosang jumenek ring Desa).

Pawos 11 .....

## Pawos 11

Pilih-pilih Krama :

- a. Pilih pasayuban sakala niskala tur kabawosin saha katiwakin pamutus sahanan wicaranya ;
- b. Nyarengin paruman tur wenang sareng mastikayang pamutus ;
- c. Kadadosang madeg Prajuru, manut pararem.

## Pawos 12

Krama Desa kadadosang :

- a. Mapoangkid utawi tan tedun :
  - 1) Rikala meyadnya, matepatin rare, sungkan kaluasang, lan siosan punika, manut pararem.
  - 2) Kengin tempo wantah apisan, sajawanin wenten wak-wakan saking Prajuru Desa, manut pararem.
- b. Nyada, mapiteges ngamademang ayah, risampun mayusa 70 warsa, tur tan dados nyuksukin, manut pararem ;
- c. Nyade, utawi nyuksukin, sane kawenangan risampun manggeh deha teruna utawi mresidayang nganutin krama ;

## Pawos 13

Wusan dados Krama Desa, luwirc ;

- a. Sangkaning :
  - 1) Pinunas ngeraga, manawi kesah kadura Desa utawi ngalangkungin sagara ;
  - 2) Kanorayang, duaning sampun tan prasida ngesehin solah mapraerti satata nguwug pemargin Awig-awig.
- b. Sang wusan makrama :
  - 1) Patut ngaturang karang ayahan ka Desa, prade karang punika karang Desa ;
  - 2) Tan polih pah-pahan saking padruweyan Desa .
- c. Sang wusan sakaning kanorayang, prade mewali malih patut :
  - a. Muntasang saluwir pamidanda utawi tategenan sane ngranayang kanorayang ;
  - b. Nunas geng pangampura maduluran panyagaskara panyapsap kaiwangan.
  - c. Naur pamanjung batu, manut pararem.

Palet 2 .....

**Palet 2**  
**Prajuru/Dulun Desa**

**Pawos 14**

- (1) Desa Adat Gelogor kaenter oleh Ki Bendesa Adat Gelogor.
- (2) Banjar kaenter oleh Klian Banjar.
- (3) Bendesa lan klian Banjar patut :
  - a. Mawiwit saking krama ngarep/wed ;
  - b. Kaadegang malarapan antuk kacatri olih parumannya soang-soang nyabran 5 (limang) warsa, sejawaning wenten parindik tios, tur dados kacatri malih ;
  - c. Maduluran Dewa saksi ring Pura Bale Agung.

**Pawos 15**

- (1) Bendesa Adat kasanggra olih :
  - a. Patujuh utawi pangliman pinaka wakilnya ;
  - b. Panyarikan pinaka juru surat ;
  - c. Pategen pinaka pangemong druwen Desa;
  - d. Kasinoman pinaka juru arah.
- (2) Kasinoman akehnya manut kawigunan saha magilir nyabran ngesasih.
- (3) Sajeroning ngenterang kasukertan niskala, Bendesa mingsinghang Pamangku Kahyangan Desa utawi sang Rumaga Sulinngih.

**Pawosan 16**

- (1) Swadharmaning Bendesa Adat luwire :
  - a. Ngenterang pamargin sadaging Awig-awig miwah pararem Desa ;
  - b. Nuntun tur ngenterang krama rawuhing warga Desa ngupadi manut patitis ;
  - c. Mawosin kalih niwakang pamutus arep ring wicara warga Desa ;
  - d. Maka dutta Desa matemuang bawos ring sapa sira ugi manut pararem.
- (2) Prade prajuru iwang palaksana keni pamidanda nikel ring kaiwangan soang-soang krama, tur dados kararyanang manut pararem.

**Pawos 17 .....**

Pawos 17

Patias utawi olih-olihan Prajuru /Dulun Desa, luwire :

- a. Luput rerampān lan papeson ;
- b. Polih tanding tengah ;
- c. Upon pacatu/palaba carik/tegal ;
- d. Patias sewosan manut pararem.

Pawos 18

- (1) Prajuru / Dulun Desa kagentosin riantukan :
  - a. Seda ;
  - b. Kanorayang dwaning iwang pamargi utawi nilar sasane ;
  - c. Wit saking pakayun utawi pinunas ngaraga.
  - d. Sampun masenger 5 warsa.
- (2) Nganorayang utawi ngentosin Prajuru/Dulu-dulu patut sajeroning paruman tur kaingkupan olih Krama Desa.

Palet 3

Indik Kukul

Pawos 19

- (1) Kukul ring Desa Luwire :
  - a. Kukul ring Kahyangan ;
  - b. Kukul Desa ;
  - c. Kukul Banjar ;
  - d. Kukul Sekaa-sekaa.
- (2) Tabuh tatepakan kukul ring Kahyangan Desa :
  - a. Nungtit/silih asih, tengeran wenten Yadnya/Upacara ;
  - b. Tulud lambat, tengeran tedun ngayah ;
  - c. Bulus tengeran wenten bhaya.
- (3) Tabuh tatepakan kukul ring soang-soang bebanjaran :
  - a. Bulus ;
    - 1) 1 tulud bulus, tengeran kageni bhaya ;
    - 2) 2 tulud bulus, tengeran kapandangan (artha bhaya) ;

2) 3 tulud .....

- 3) 3 tulus bulus, tengeran jiwa bhaya ;
  - 4) Tigang klentung bulus, tegeran lindu, er, lan pawana bhaya.
- b. Lambat :
- 1) 1 tulus lambat, tengeran tedun ngayah utawi wenten pakrayan.
  - 2) Nungtit silih asih tengeran, surya graha, bulan kapangan ;
  - 3) 1 Tulus lambat, tengeran kalayu sekaran sakewanten tepakanya lambatan ring angra siki.
- c. Klentongan :
1. 1 kelentongan, tengeran rare embas ;
  2. 3 kelentongan, tengeran pawiwahan ;
  3. 3 x 3 kelentongan, tengeran ngangdeang karya.

#### Pawos 20

- (1) Kukul Desa utawi Banjar tan wenang katepak yening tan sangkaning pituduh Prajuru Desa/Banjar sajawaning tengeran bhaya.
- (2) Sang nepak tan sangkaning pituduh patut digelis atur supeks maka buatan panepake, yan tan sapunika wenang sang mawurung kadande manut pararem.
- (3) Kukul ngawenin (matekin). Sukat utawi tengeran kukul Desa/Banjar, sekaa-sekaa samaliha kukul pondokan-pondokan tan kelugra sajawaning tengeran bhaya prademamurug taler kadanda manut pararem.

#### Palet 4

#### Indik Paruman

#### Pawos 21

- (1) Paruman/sangkepan ring Desa Adat Gelogor, wenten :
  - a. Paruman Desa / Banjar, kawentenang :
    - 1) Nyabran ngasasih, maka cihna tanpa arah-arah, dwaning sampun tetep panamaya manut pararem nemoning rahina Buda Keliwon Desa Adat, Buda Wage Banjar Dinas.
    - 2) Napkala (padgata kala) maka jalaran arah-arah manut tatujon.

b. Sangkepan .....

- b. Sangkepan Prajuru/dulun desa, kawentenang manut wiguna ;
  - c. Paruman sekaa-sekaa manut pabuat.
- (2) Paruman Desa utawi Banjar madudonan sakadi ring sor :
- a. Prasida lumaksana risampun katedunin olih sang patut ngamiletin, kamanggala antuk tengeran kulkul miwah mabusana Adat madya, saha tan kalugra makta gegawan saka luwire ;  
Tan marep ngarcana ring Ida Bhagawan panyarikan maka sarana Widi Widana cane ;
  - b. Maka sarana janggi, pangawit klaksanayang panyacak sepsepan saha riwusannya nyacak, ngetang dadosan gung alit manut pararem ;
  - c. Tan kalugra ngawetuang suwara gora utawi byota, yan wenten asapuika keni pamidanda beya pacamil kadi dandaning nguman-uman ring sabha ;
  - d. Pamutus babawos beriuk sepanggul (ingkup) punika kamanggehang.
- (3) Prade pidaging paruman tan kaingupin mangda Prajuru/Dulun Desa ngilikang babawos saha pamutusnya mangda kararemin olih krama Desa, bilih tan prasida kasungkemin jantos ping tiga Prajuru/Dulu wenang nunas bawos ring Sang Ngaw Wenang.

#### Pawos 22

- (1) Sajeroning paruman Desa, Bendesa patut nyobyahang pamargin ngenterang Desa, pamekas nganinin indik :
  - a. Munjuk lungsuring pakraman saha ayah-ayah, sulur arta berana, druwen Desa ;
  - b. Rarincikan Prajuru/Dulu nganinin usaha Desa kapungkur.
- (2) Pamutus paruman Desa sinanggegh pararem maka pamitegep daging Awig-awig.

#### Pawos 23

- (1) Sangkepan Prajuru/Dulun Desa Kawenangan wantah ngarincikang pangerencana usaha Desa kapungkur.
- (2) Sangkepan Prajuru/Dulun Desa tan kawenang ngawedalang tategenan ring Krama sadereng kaingkupin olih Krama Desa.
- (3) Pamutus sangkepan prajuru/Dulun Desa ngawetuang pasuwara, maka pidaging pituduh sang Ngawawenang utawi ngonekang pecak pararem krama desa.

Palet 5 .....

Palet 5

Indik Druwen Desa

Pawos 24

Padruwen Desa Adat Gelogor sakadi ring sor :

- a. Kahyangan Desa luwire :
  - 1) Kahyangan Tiga : Pura Desa lan Bale Agung, Pura Pusch, Pura Dalem lan Praja Pati lan yang tiba.
  - 2) Pura Melanting.
  - 3) Pura Beji.
  - 4) Pura Nataran.
- b. Wantilan Desa ;
- c. Tanah tegelan (manut ilikita) ;
- d. Karang ayahan Desa, munjuk lungsur saking akweh karang ring ajeng ;
- e. Setra-setra palebahan, makadi setra pekingsan, setra pangarep ;
- f. Lelanguan, makadi tetabuhan lan ilen-ilen padruwen Desa/babanjaran luwire;
- g. Lelanguan, makadi tetabuhan.

Pawos 25

Piolihi-olihi Desa Adat Gelogor luwire :

- a. Piolihi-olihi saking palaba Pura ;
- b. Urunan Krama Desa Adat ;
- c. Paica Saking Guru Wisesa ;
- d. Paice-paice sane tiyosan, sane patut ;
- e. Usaha Desa Adat.

Pawos 26

- (1) Prajuru/Dulun Desa wenang ngetangan pamupon laba Pura lan sapanunggalan lan druwen Desa.
- (2) Pikolihi lan pamuponnya kaanggen prabeya piodalan miwah wewangun ring Pura.

(3) Nyabran .....

- (3) Nyabran pasangkepan Desa, Prajuru/Dulu pangamong druwe desa nguninga- yang pariindik mujuk lungsuring padruwcan ring Krama Desa.
- (4) Sakaluwiring druwen Desa patut wenten ilikitannya.
- (5) Tan kalugra ngadol utawi ngesahang padruweyan Desa yan tan kasungkemin olih Krama paruman.

**Palet 6**

**Sukertan Pamitegep**

**Kaping 1**

**Karang, tegal lan carik**

**Pawos 27**

- (1) Krama Desa Pangamong Karang Desa utawi karang gunakaya patut ngawatesin karang inucap tembok utawi pagehan mangda pakantunya asri.
- (2) Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaluan, sajawaning tanah pacatu, tegal carik tanah padruweyan ngeraga, sane kapiare watese sisi klod miwah kauh utawi manut drestha reh punika mawasta gegaleng kateben.
- (3) Prade karasayang pagehan/turus inucap ngalikadin, yen pada arsa panyandinge, kengin watese ngangge pinget kewanten, kesaksinin oleh Prajuru/Dulu Desa utawi pracihna pal saking Sang Ngawawenang.
- (4) Prade wenten karang kabebeng/embet mangda kautsahayang wenten pamarginnya, manut paigum lan pararem.

**Pawos 28**

- (1) Sinalih tunggil Krama Desa/Banjar tan kalugra :
  - a. Ngalah-alah margi, tegal ayahan Desa, lan sapa nunggalanya (margi adat/baru sengkernya 10 meter) ;
  - b. Ngalah-ngalah tanah linggih Kahyangan, tegak setra, lan sakancan linggih sinanggeh suci.
- (2) Prade wenten sekadi ring ajeng, sang ngelalah wenang ngawaliang tanah inucap saha keni panidanda manut pararem kadulurin upakara prade ngelahlah tanah suci.

**Kaping 2 .....**

## Kaping 2 Papayonan

- (1) Ngawit nandur papayonan tanem tuwuh patut adepa agung 2 (meter) ngajeroang saking wates, prade jantos ngaliwat wates wenang kasepat gantungin.
- (2) Yening wenten tetanduran ngungkulin, samaliha mawastu mayonin kapisaga patut kawara antuk paiguman ping ajeng mangda prasida sang nruwenang wit ngerebah utawi notor.
- (3) Prade sampun kaware taler tan wenten usaha sang nruwenang wit, sang rumasa katetchan/kajerihan wenang masadok ring Prajuru/Dulu, tur risampun kaparitas kalugra mademang wit inucap, sakewanten patin papayonan patut katawur manut pengeloika sane nepasin.
- (4) Sang keni pamidanda penyangaskara saha prabya manut pararem arep ring wewangunan sane karubuhin, luwire ;
  - a. Sang nruwenang wit sinanggeh mayanin, prade pungkut ngerubuhin wewangunan krama tiyos ;
  - b. Sang notor, munggul utawi ngerebah taru tur ngerubuhin krama tiyos.
- (5) Krama Desa Adat Gelogor patut ngamanggehang kawardian tanem tuwuh sane ngawidanang Desane asri.

## Kaping 3 Wawangunan

Pawos 30

- (1) Nyabran ngawangun Krama Desa Adat Gelogor patut :
  - a. Masadok ring Prajuru/Dulu, ping ajeng prade wewangunan nganinin wates ;
  - b. Ngangge sukat Asta Bhumi miwah gagulak asta kosala-kosali, sanistane manut ring patitis niskala ;
  - c. Tan nyayubin kapisaga.
- (2) Prade wewangunan jantos nyayubin bilih-bilih temboke ring telengin wates, risampun kawara tur kasodokang ring Prajuru/Dulu, wenang kadanda manut pararem saha tembok inucap kagubar utawi sanistane magda kakaryanang abangan.

Kaping 4 .....

Kaping 4  
Wewalungan

Pawos 31

- (1) Warga Desa sane mamiara wewalungan patut sayaga nitenin negul/ngelogor magda tan ngarusak karang utawi pabianan Krama sewos, bilih-bilih jantos ngeranjing ngaletihin Kahyangan.
- (2) Prade wenten wewalungan malumbar utawi ngeleb ngarusak pakaran/pabianan Krama sewos, risampun kawara dados ketaban tur kadanda ngawaliang wit sane karusak saha nawur panebas papiaran tetabanan, manut pengeloikan Prajuru/Dulun Desa.
- (3) Prade jantos ngaletihin linggih suci, minakadi Pamrajan, risampun kaparitas olah Prajuru/Dulu wenang sang nruwenang kadanda mabuhu agung (cara eka sata, maduluran tebasan prascita durmanggala), Prade ngeletihan Kahyangan Desa utawi Pura Pemaksan, wenang nyaronin antuk Panca Sata makerep itik belang kalung.
- (4) Krama Desa patut nyangra wewalungan miwah sarwa prani, tan kapatutang ngamademang paksi, nuba ulam, miwah sane sewosan. Prade wenten melaksana sakadi punika keni pamidanda manut pararem tur kaaturang ring sang Ngawawenang.

Kaping 5  
Bhaya

Pawos 32

- (1) Parindik bhaya, luwire : jiwa bhaya, artha bhaya, (kapandangan), dura cara ring Agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 19 (3) aksara a.
- (3) Prade ring Desa kahanan jiwa bhaya, patut Desane ngaturang Bhuta Yadnya tur sang mayanin kaaturang ring Sang Ngawawenang.

(4) Prade .....

(4) Prade wenten jatma mamisuh utawi nguman-uman jatma tiyos, kakenanin pamidanda beya pacamil maduluran tebasan prayascitta.

(5) Yaning wenten jatma majengilan ring Bale Banjar, ring Pura utawi ring genah sane kasinanggeh suci, keni pamidanda manut pararem, maduluran panyangaskara prade sang mejengilan kantos ngemedalang rah.

### Pawos 33

(1) Sang manggihin kahanan artha bhaya (kamalingan), patut ngulkul mapitulung manut ring pawos 19 (3) aksara a utawi sang kamalingan atur supeksa ring Prajuru/Dulun Desa sane pacang nimbangin utawi nandanin manut pararem, saha maweweh panyangaskara prade wenten jatma ngamaling barang sinanggah suci.

(2) Pratingkahe mapailon ring dusta saruron, prade wenten jatma manggihan maling tan nyadokang ring Prajuru/Dulu jantos jatma tios nyaduang, patut kadanda kadi dandaning maling, sakweh pangargan wit manut cacakan Banjar, tur prade jantos ping tiga, melaksana asapunika wenang kasukserah ring Sang Ngawawenang.

(3) Prade wenten jatma ngarereh reramon, minakadi daun kelapa, ron tanpa sadok ring sang nruwenang wit, prade kacunduk (katara) patut kadanda kadi dandaning maling.

(4) Yening wenten jatma ngeranjing kapakubon wiadin pakarangan jatma tiyos rikala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.

(5) Mangda tan katuwekang manut sekadi ring ajeng, asing-asing ngeranjing kapakubon jatma tiyos patut :

a. Matengeran suwara (makaukan) :

b. Nyantos sang nruwenang karang rauh utawi masadok ring pangapit pinih tampek, maka buatan pangeranjinge ;

c. Pamedal karangnya kadagingin sawen , maka china pangaral rikala suwung.

Kaping 6 .....

**Kaping 6**  
**Panyanggran Banjar**

Pawos 34

Krama Desa Adat Gelogor rikala ngawentenan karya suka-duka, patut kasanggara olih Banjar, luwire :

- a. Prade ngawangun Pitra Yadnya utawi Manusia Yadnya, manut pinunas sang mayadnya ;
- b. Pangarombo utawi karya gotong-royong ngantos puput ;
- c. Pangingu rikala Pitra Yadnya manut abot dengan yadnya, prade saking semengan ngantos wengi katuran pangingu ping kalih.
- d. Pangerombo tiyosan manut pararem.

**SARGA IV**  
**SUKERTA - TATA AGAMA**

Palet 1  
**Indik Dewa Yadnya**

Pawos 35

- (1) Kahyangan Panyiwian ring sawidangan Desa Adat Gelogor Luwire :
  - a. Kahyangan Tiga, Pura Desa/Bale Agung, Puseh miwah Pura Dalem lan Prajapati, yang tiba.
  - b. Pura Beji.
  - c. Pura Melanting.
  - d. Pura Nataran.
- (2) Rahina Piodalan ring soang-soang Kahyangan inucap, kadi ring sor :
  - a. Ring Kahyangan Tiga, luwire :
    - 1) Pura Desa/Bale Agung rikala Budha Manis Wuku Perangbakat.
    - 2) Pura Puseh, rikala Anggara kasih Wuku Perangbakat.
    - 3) Pura Dalem ring Budha Cemeng Klawu
  - b. Pura Prajapati rikala Budha Cemeng Klawu
  - c. Pura Melanting rikala Tumpek Wariga

d. Pura Beji .....

- d. Pura Beji rikala Purnamaning Kapat (ngarwarsa)
  - e. Pura Nataran rikala Weraspati Manis Wuku Paang.
- (3) Pengaci ring inucap manut kecap sastra Agama, saha kelaksanayang nista, madia, utama manut kawentenan lan pararem.

Pawos 36

Indik Pemangku

- (1) Ring soang-soang Pura inucap patut keadegang Pemangku ;
- (2) Ngadegang Pemangku manut dudonan :
  - a. Nyanjan utawi masemurang, soang-soang mapiteges mapinunas ring ajeng Pura wiadin kadura Desa manawi ring balian konteng, lan sapanunggilannya;
  - b. Turunan utawi warisan ;
- (3) Tan kawenang adegang Pamangku luwire :
  - a. Cendangga makadi peceng, perot, cungh lan sapanunggilan ipun ;
  - b. Sang sapisira ugi sane tan kapatutang manut pararem ;
  - c. Sakit ila, ayan, buduh wiadin edan ;
  - d. Sane tan madrebe kasucian urip.
- (4) Prabia kapamangkuan :
  - a. Adiksa Widhi (ngawintenin) kamedalin saha kelaksanayang olih sang ngadegang, makadi krama Desa utawi pangempon pura soang-soang ;
  - b. Mapitra Yadnya riwekas patut kasungkemin olih Krama Desa utawi pengemong sanistane Brahma prayascita, payangrane manut pararem prade Yadnya inucap kalaksanayang oleh wargan sira pamangku.
- (5) Pamangku patut ngamangehang sasaning Pemangku luwire :
  - a. Ambek Dharma Sadhu ;
  - b. Asewaka Dharma, makadang sastra utama ;
  - c. Tan parek ring naya dustiha ;
  - d. Tan atayub ring tarub cemara yudha ;
  - e. Tan manjing ring umah wong banija krama ;
  - f. Tan manjing ring umah wong drati krama ;
  - g. Tan wenang ajajuden ;

h. Tan anginum .....

- h. Tan anginum asing angawe mada ;
  - i. Tan pati pikulan-pikulan ;
  - j. Tan salah suluh ;
  - k. Tanwenang anayub upadrawaning cor, yan mawiyawahara teka wenang adewa saksi ;
  - l. Tan griganing wong akweh ;
  - m. Tan keneng cuntakaning wong len, sajawanin kulawarganya tunggil natah, utawi pasiwanya manut dresta.
- (6) Prade mamurug wenang Pamangku nyepuhin raga kasaksinin olih Prajuru.

Pawos 37

Swadharmaning pemangku, luwire :

- a. Ngenterang upacara piodalan ring kahyangan utawi ring soang-soang pakubon krama;
- b. Prade salah sinunggil Mangku kapialang utawi cuntaka, kengin nguntap Pamangku tiosan utawi nuur Sang Sulinggih.
- c. Samalihe yan sampun Pamangku ngayah ring Pura Kancit wenten kaluwargannya seda, Pamangku inucap tan keneng cuntaka sakewanten Pamangku tan budal salami piodalan.

Pawos 38

Patitas utawi olih-olihan Pamangku luwire :

- a. Panyolasan miwah sarin canang ring soang-soang pakubon krama Desa ;
- b. Upon palaba carik miwah tegal manut pararem ;
- c. Luput pakaryan, rerampen/reramon, lan padagingan (luput manuk) ;
- d. Patias sewosan manut pararem.

Pawos 39

(1) Pamangku kagentosin riantukan :

- a. Seda ;
  - b. Pinunas ngaraga, sangkaning kageringan lan sapanunggal, manut pararem ;
  - c. Kauwusang olih krama sangkaning melaksana sane tan patut.
- (2) Prade Pamangku kauwusang sangkaning melaksana tan patut keni pidanda manut pararem.

Pawos 40 .....

Pawos 40

Kasukertan Kahyangan kadi ring sor :

- a. Tar kalugra ngeranjing kapura luwire :
  - 1) Sang katiben cuntaka ;
  - 2) Makta sahanan barang sinanggeh ngelechin ;
  - 3) Sato agung, sajawaning rikala mapapada ;
  - 4) Mabusana sane tan manut kadi tata caraning ngaranjing kapura ;
  - 5) Sadereng polih wak-wakan (pituduh) Prajuru/Dulun Desa.
- b. Pratingkahe tan wenang ring Pura :
  - 1) Masumpah (cor) sajawaning pituduh Prajuru/Dulun Desa ;
  - 2) Makobetan, masesenangan, makolem dados asiki lanang wadon mabacin. mawarih, macecepin rare, nyangsang busana, menahin pusungan (santukar punika rikala majajahitan tan patut ngelung busung mecingor lidinya) ;
  - 3) Munggah tedun palinggih sajawaning pituduh Prajuru/Dulu.
- c. Sang mamurug kecap ring ajeng keni pamidanda pamrayascitta sapatutnya.

Pawos 41

- (1) Yan wenten jatma karawuhan ring Pura, dados kapintonin, prade rumasa kesumangsayan, yan tan wiakti, jatma punika inucap kasisipang manut ring pararem.
- (2) Prade Kahyangan kahanan durmanggala, minakadi keni bhaya Pamangku/Sang manggihin, patut di gelis nyadokang ring Prajuru/Dulu mangda marumang krama Desa tur ngawentenang pamrayascitta sapatutnya.

Palet 2

Indik Resi Yadnya

Pawos 42

- (1) Sang pacang madeg Pandita utawi Pinandita minakadi Balian Sonteng, Kubayan, Dalang, sakaluwiring sane jagi ngenterang Yadnya patut masadok ring Prajuru Desa utawi Parisada Hindu Dharma Indonesia.

(2) Prajuru .....

- (2) Prajuru Desa patut ngawas nitenin tur wenang ngalangin prade wenten kacihnan nyasar kakecap miwah drestane, tur sareng nyaksinin upacaranya saha nyobyahang ring paruman Desa tegep rawuhing wates kawenangannya ngenterang yadnya.
- (3) Krama Desa patut ngaturang ayah sapatadeg miwah ring pangelepas Sang Sulinggih riwekas kantuntun olih Prajuru/Dulu Desa.

#### Pawos 43

- (1) Sang Sulinggih Patut ngariyining muputang ring wewidangan Desa Adat Gelogor, sesampun punika wawu muputang yadnya kajebar tios Desa utawi kadura Desa.
- (2) Krama Desa sami patut sareng ngawas nitenin katuntun olih Prajuru/Dulu-dulu, mangda sahanan yadnya sane kawentenang kaicen pamuput olih Pedanda utawi Pinandita manut kawengannya soang-soang.

#### Palet 3

#### Indik Pitra Yadnya

#### Pawos 44

Pamargin Pitra Yadnya Medudonan manut sekadi ring sor :

\* Pangupakaran Sang kalayu sekaran :

- 1) Antuk mendem utawi ngeseng, makacihna pakinsan ring Ibu Pertiwi utawi ring Betara Brahma, salami nuptupang parabeya (manut pararem).
- 2) Atiwa-tiwa (upacara pangabenan/palebon) utamanya Pemangku.
- 3) Ngelungah : resampun mayusa 3 sasih ngantos durung maketus manut pararem.

#### Pawos 45

Swadharmaning lan tetegenan prade wenten sinalih tunggil krama kalayu sekaran :

a. Sang Kaduhkitan patut :

- 1) Nyadokang ring Klijan tur nunas tatimbangan ring kawentenanya ;
- 2) Ngaturin Banjar ngerombo makarya eteh-ete sawa saha ngater kasetra, tur katuran panyambrama canang sasida-sidan.

b. Swadarning .....

- b. Swadarmaning Banjar :
- 1) Klian Banjar maritatas pamargin sang kaduhkitan, napike pacang kapendem, makingsan riyin.
  - 2) Prade kapendem, raris kaswarayang kulkul pamitahu manut pawos 19 (3) aksara b olih Klian Banjar utawi Wakilnya.
  - 3) Panyanggiran Banjar selanturnyane :
    - a) Soang-soang Krama Banjar patut nabing lan mapitulung ring Sang kaduhkitan ;
    - b) Ngerombo ngaryanin eteh-ete sawa, kasarengin olih Krama sane rawuh ngerombo.
    - c) Sami Krama Banjar ngenter kasetra jantos patut pamendemane.
  - c. Tan kengin ngalelet langkungan ring 7 (pitung) rahina, tur patut polih pagebagan manut paetengan Klian patas/Banjar .
  - d. Tan kalugra nginepang bangbang miwah mendem rikala :
 

Semut sadulur,  
 Kala gotongan,  
 Pasah,  
 Kliwon, kajeng kliwon,  
 Soma, Umanis, Taulu,  
 Was penganten,  
 Ingkel Wong  
 Prawani, Purnama, Tilem,  
 Rerahinan jagat
  - e. Prade wenten kalayu sekaran rikala piodalan, kengin mendem tanpa sadok tur mamargi wengi/sasiliban utawi kesetra siosan (setra pakingsan).

Pawos 46

- (1) Sane kasinanggeh kacuntaka sakadi ring sor :
  - a. Cuntaka antuk kalayu sekaran ;
  - b. Cuntaka antuk ngeraja swala ;
  - c. Cuntaka antuk ngembasang putra ;
  - d. Cuntaka antuk karuron ;
  - e. Cuntaka antuk sakit ila, buduh ;

f. Cuntaka .....

- f. Cuntaka antuk pawiwahan ;
  - g. Cuntaka antuk gamia gamana ;
  - h. Cuntaka antuk salah timpal ;
  - i. Cuntaka antuk yening wenten anak istri mobot nenten kaupakarayang pabiukawonan miwah pawidiwidana ;
  - j. Cuntaka antuk mamitra ngalang ;
  - k. Cuntaka antuk yaning wenten anak istri ngamedalang putra sadurunge maupakara pabiukawonan miwah pawidiwidana ;
  - l. Cuntaka antuk Sad Tatayi ;
- (2) Sengker cuntaka menut kawentenannya :
- a. Cuntaka kalayu sekaran, cuntakanya kaanutang ring loka dresta Desa Adat soang-soang.
  - b. Cuntaka ngaraja swala, 3 rahina ngawit saking ngeraja swala utawi selamining ngeraja swala ;
  - c. Cuntaka ngembas putra, 42 rahina (abulan pitung rahina) ngawit saking putrane embas, utawi ngantos sampun kaupakarayang makakambuhan lan maperayascita manut Sastra Agama, (istri kemanten), lanang 12 hari.
  - d. Cuntaka karuron, cuntakanya abulan pitung rahina (42 rahina) tur sampun matirta maperayascita ;
  - e. Cuntaka sakit ila, buduh/edan, cuntakanya manut ilikita pastika saking Sang Ngawawenang miwah sampun pamerasyasita raga ;
  - f. Cuntaka pawiwahan, cuntakanya ngantos sasampune matirta pabiukawonan ;
  - g. Cuntaka gamia gamana, cuntakanya ngatos sesampune kapalasang/kasapihan tur sampun kawntenang pamrayascita raga miwah pamrayasita Desa Adat/Kahyangan ;
  - h. Cuntaka salah timpal kapuputang manut ring Sastra Agama Hindu ;
  - i. Cuntaka anak istri mobot nenten kawntenang upakara pabiukawonan, cuntakannya ngantos kawntenan upakara pabiukaonan ;
  - j. Cuntaka mamitra ngalang, cuntakanya ngantos kawntenang upakara pabiukawonan ;

k. Ngebasang .....

- k. Ngebasang putra nenten kewentenang upakara pabiukaonan miwah pawidiwidana, cuntakanya ngantos wenten sane memeras sang putra, lan sampun kawentenang upakara manut ring sastra Agama padwijatian ;
  - l. Cuntaka sad Tatayi, cuntakanya ngantos sampun maprayascita raga tur nenten pisandados ngamungganghang upakara padwijatian.
- (3) Cuntaka kalayu sekaran/pamadem :
- a. Kepadem cuntakanya :
    - 1) Cuntaka/sebel kabanjar ngantos 3 rahina riwusnya mendem utawi sasampun polih pamrayascita,
    - 2) Kulawargania sajeroning pakarangan ngatos 42 rahina (mecaru).
  - b. kaabenang cuntakanya :

Sang nyambut karya Pitra Yadnya cuntakanya ngawit saking nyambut padewasan karya, wusan mapegat kalanturang malih tigang rahina.

- (4) Sane katiben cuntaka luwire :
- a. Kalayu sekaran sane cuntaka ;
    - 1) Sang sane kalayu sekaran ;
    - 2) Kulawarganya ;
    - 3) Bebanjaran ;
  - b. Ngeraja swala sane kacunduk :
    - Sang sane Ngeraja Swala
  - c. Ngembas putra sane kacuntaka :
    - Kulawargania sane ngembasang putra lanang wiadin istri.
  - d. Pawiwahan sane kecuntaka
    - Sang sane ngelaksanayang pawiwahan lanang wiadin istri.
  - e. Sakit ila/buduh, sane kacuntaka raganya
  - f. Karuron sane kacuntaka :
    - Kulawarganya lanangwiadin istri ;
  - g. Gamia gamana sane kacuntaka :
    - 1) Sang sane ngelaksanayang gamia gamana ;
    - 2) Desa adat nyane.
  - h. Salah timpal sane kacuntaka :
    - 1) Sang sane melaksana salah timpal ;
    - 2) Kulawarganya ;

3) Desa .....

- 3) Desa adat.
- i. Anak istri mobot nenten kewentenang upacara pabiukaonan sane kacuntaka :
    - Sane meraga istri (sane mobot).
  - j. Mamitra ngalang sane kacuntaka :
    - Sane ngalaksanayang mamitra ngalang.
  - k. Ngembas putra nenten kawentenang upakara pabiukaonan miwah upakara pawidi-widana sane kacuntaka :
    - 1) Sang sane ngembasang putra ;
    - 2) Putra sane mbas.
  - l. Sad Tatayi, sane cuntaka :
    - Sang melaksana Sad Tatayi sajawanin kulawargania tunggil natar pasiwanya /nabenya.
- (5) Tan keneng cuntaka, luwire :
- 1) Sang Sulinggih lan Pamangku Kahyangan Tiga ;
  - 2) Rikala piodalan risampun ngalang sasih/ngalang tegeh.

Pawos 47

- (1) Attiwa-tiwa (pangabenan) kelaksanayang antuk :
  - a. Sawa prateka, pengabenan mawatang sawa ;
  - b. Sawa resi, pengabenan mewatang antuk sawa kresyan ;
  - c. Suwasta, pengabenan mawatang sawa sane tan kakeniang, kagentos antuk lalang utawi toya.
- (2) Panemayan pengabenan wenten kalih pawos :
  - a. Ngaben dadakan/bah bangun manut pararem ;
  - b. Ngaben ngamasa, manut pararem ;
- (3) Dudonan pangabenan kawit saking ngagah (seda) , ngeseng ngantos pangiriman utawi ngayut.

Pawos 48

- (1) Peputusan pangabenan wenten kalih :
  - a. Ngaben ngamasa luwire manut pararem ;
  - b. Ngaben dadakan, pateh sakadi patus seda kapendem
- (3) Pangingune ring Krama Banjar ngawit ngayah manut abot dangan kewentenan karya.

Palet 4

Indik Manusia Yadnya

Pawos 49

- (1) Manusia Yadnya inggih punika upacara-upakara dharmaning manusa, ngawit sakeng patemoning kama bang kalawan kama petak sajeroning gaba ngantos kalayu sekaran riwekas.
- (2) Upacara ring ajeng madudonan sakadi ring sor :
  - a. Magedong-gedongan duk pengerempian ibiang ;
  - b. Duk sang kama reka medal ;
  - c. Kepus odel ;
  - d. Roras rahina ;
  - e. Tutug kambuhan (42 rahina) ;
  - f. Nigang sasih (3 sasih) ;
  - g. Pawetuan/otonan/odalan (6 bulan) ;
  - h. Tutug keklih (ngeraja swala wadone, ngembakin lanange) ;
  - i. Matatah/ mapandes ;
  - j. Mawiwaha ;
  - k. mawinten.
- (3) Upacara-upakara inucap nista, madia, utama manut sastra Agama Hindu lan dresta.

Palet 5

Indik Bhuta Yadnya

Pawas 50

- (1) Bhuta Yadnya inggih punika upacara-upakara byakala ring pratiwi lan kahyangan, sarwa prani saha upacara-upakara ring babuthan muwah ring piranti sewosan.
- (2) Upacara pabyakala ring sarwa prani, tumuwuh muwah piranti luwire :
  - a. Ring sarwa lelandep rikala Saniscara Kliwon ware Landep ;
  - b. Ring sarwa tumuwuh lan piranti rikala Saniscara Kliwon wara Wariga ;
  - c. Ring sarwa syandana/wahana rikala Saniscara Kliwon wara Klurut ;
  - d. Ring sarwa lelangan rikala Saniscara Kliwon wara Kuningan ;

e. Ring Sarwa .....

- e. Ring sarwa ingon-ingon/wewalungan rikala Saniscara Kliwon wara Uye ;
  - f. Ring sarwa ringit, ukir-ukiran rikala Saniscara Kliwon wara Wayang ;
  - g. Upacara pakala-kala manusia manut widana, kabawos pabyakala ;
- (3) Upacara pabyakala ring Pratiwi, Kahyangan lan Babuthan kawastanin macaru.
- (4) Pacaruan kadi ajeng kawentenang upakara :
- a. Ekasata ;
  - b. Panca sata ;
  - c. Panca sanak ;
  - d. Resi gana ;
  - e. Tawur Agung ;
  - f. Panca kelud.
- (5) Sajawaning kadi ajeng kawentenang upakara :
- a. Majot-jotan utawi yadnya sesa nyabran wusan ngerateng ;
  - b. Masapuh-sapuh rikala pacang wali ring Pura ;
  - c. Pacaruan pasasihan kalaksanayang nangken Tilem ngawit sasih ka 3, 6, 7, 8, lan ka 9, sajawaning wenten durbhiksan jagat.

#### Pawos 51

- (1) Nangken ngawarsa rikalaning Tilem Kasanga kawentenang Tawur Kasanga, kalanturang antuk ngarupuk, maceihna pacang mapag rahina panyepian benjangne.
- (2) Brata panyepian sane kemargian olih Krama Desa :
- a. Amati geni, tankengin maapi-api ;
  - b. Amati karya, tankengin nyambut karya ;
  - c. Amati lelangan, tan keingin maonang-onengan, masuwara gora, lan sapanunggalannya.
  - d. Amati lelungan, tan dados malancaran.
- (3) Pabratan inucap kamargiang sakeng semeng ngantos semeng benjangne raris kasuwarayang kulkul punika cihna pangembak.
- (4) Sang mamurung kecap ring ajeng keni pamidanda manut pararem, nurmaning kamargiang olih patelik (Pacalang Desa)
- (5) Riwus rahina Nycpi (benjangne) maka cihna pangawit Icaka Warsa, patut warga Desa sami madharma santi.

SARGA V .....

SARGA V  
SUKERTA TATA PAWONGAN

Palet 1

Indik Pawiwahan

Pawos 52

- (1) Pawiwahan inggih punika patemon purusa kalawan pradana, malarapan panunggalan kayun suka lila kadulurin upasaksi sakala niskala.
- (2) Pamargin pawiwahan luwire :
  - a. Pepedikan, kamanggala antuk pakrunayang ;
  - b. Ngerorod, merangkat riyin wawu kakrunayang ;
  - c. Nyeburin utawi sentana nyeburin (risampun nganut upakara pamerasan);
- (3) Pidabdab sang pacang mawiwaha patut :
  - a. Sampun menggeh daha-teruna (prasida nganutin Undang-undang) ;
  - b. Sangkaning pada lila (tan kapaksa) ;
  - c. Manut kecap sastra Agama (tan gamia gumana) ;
  - d. Kasudiwani prade pengembile tios Agama, utawi kapitiwangi.
- (4) Pamargin pawiwahan mangda taler nganutin Undang-undang Perkawinan sakeng Sang Ngawawenang.

Pawos 52

- (1) Pawiwahan sane kapatutang ring Desa, sakadi ring sor ;
  - a. Sampun kamargiang pabyakala utawi pasakapan , kasaksiang sekala nisakala olih Pandita utawi Panandita ;
  - b. Wenten pasaksi Prajuru/Dulu-dulu sane mapakelingang utawi ngilitikayang pawiwahan ;
  - c. Sampun matengeran suwaran kulkul ;
  - d. Pawiwahan inucap ring ajeng sampun kacatetang ring Sang Ngawawenang.
- (2) Parabian sane tan manut kadi kecap ring ajeng sinanggeh tan patut.

Pawos 54 .....

Tata caraning parabian patut sakadi ring sor :

- a. Sapa sira ugi-pacang ngawarangang pakulawangan patut masadok ring Prajuru/Dulu-dulu, salanturnya Prajuru/Dulu maritatas manut tan manut pamargin parabian ;
- b. Pamargin pepadikan manut dudonan :
  - 1) Pakrunayan jantos ping tiga, saha soang-soang malarapan :
    - a. Kapertama antuk canang/sedah ;
    - b. Kaping kalih antuk canang pangrawos ;
    - c. Kaping tiga antuk daksina pajati kabawos pamuput pamadikan.
  - 2) Risampun puput raris sang istri kaajak budal ring pakubon sang lanang, saha kalanturang antuk pabyakala.
  - 3) Mangda puput tumus sakala niskala raris kaluwarga purusa makta pajati ring Pamerajan Wadone.
- c. Prade ngerorod/merangkat patut :
  - 1) Raraman lanange ngawentenang pamilaku/pangenduh antuk duta sakirangnya 2 (kalih) diri ;
  - 2). Pagenahan antene tan kengin ring pakubon sang lanang sadereng mabyakala.
- d. Sejeroning pakrunayan/pengeluaran patut :
  - 1) Kamanggala antuk geng pangampura arep ring reraman wadone ;
  - 2) Kaigumang bawos indik pakidih utawi palegayan arep ring pasawekan sang ngidih saha dewasa pakrabkambeyane riwekas ;
  - 3) Kacihnayang indik kaparusa utawi prade sentana rajeg kajejerang kapuput ngidih anak lanang sane kabawos pawiwahan nyeburin, tur risampun sulur pemerasan kategepin kamanggehang sentana nyeburin ;
  - 4) Prade tan terima pejati, pakrunayan kamargiang jantos ping tiga.
- e. Pakerab-kambeyan mapiteges upacara tinas apadang (puput) mapakuren, dwaning manut sakadi ring sor :
  - 1) Sajeroning kabawos ambe, kalaksanayang ring sekala niskala sarana jejauman miwah pawidi widana :
    - a. Jejauman pinaka ngambe/ngadungan kayun soang-soang pakulawargaan wadonne ;
    - b. Widi widana pinaka pajati niskala nunas wadone ring Pemerajanya.

2) Sejeroning

- 2) Sejeroning bawos kerap pamargi ring sakala :
- a) Antuk Payaksi Krama Banjar, dwaning kaparabiang tengcran swara kulkul ;
  - b) Pamekas pasaksi Prajuru/Dulu-dulu sane ngilikitayang.

#### Palet 2

#### Indik Nyapian

#### Pawos 55

- (1) Pawiwahan parsida kawusang malarapan antuk palas parabian utawi kapademan.
- (2) Wusan mapakuren riantukan salah sinunggal seda mapiteges balu, makadi balu lanang/istri.
- (3) Palas parabian wenten kalih, pawos inggih punika sangkaning pada lila miwah mawiwit wicara.
- (4) Sang ayat palas marabian patut atau supeksa pailikitan riyin ring sang rumawos wastu tinas apadang pamutuse kabawos nyapian wawu Prajuru nyobiahang kawentenanya ring Desa saha keni panebas swaran kulkul manut pararem.

#### Pawos 56

Tata cara palas parabian sangkanin pada lila sakadi ring sor :

- a. Nawur prabeya pasaksi sinalih tunggil sami matenga ;
- b. Pagunakaya polih pahan pada ;
- c. Pabekel, tadtadan soang-soang kakuasa niri-niri miwah warisan kakuasa olih purusa ;
- d. Ngarawuhin miwah ngupajiwain pratisentane manut swadharmaning guru rupaka ;
- e. Nawur pamidanda penebasan swaran kulkul manut pararem ;
- f. Ngelung jinah logika Prajuru/Dulu.

#### Pawos 57

Prade riwekas sang palas kacihnan adung malih, patut :

- a. Ngalaksanayang pawiwah malih ;
- b. Kadenda nikel saking palase, yadiastun wit palase pecak sangkaning pada lila.

Pawos 54 .....

### Pawos 58

- (1) Sang balu kabinayang dados :
  - a. Balu luh wit sentana (sentana rajeg) miwah balu luh boya sentana ;
  - b. Balu muani kaparusa (wit sentana) miwah balu muani nyeburin (boya sentana)
- (2) Swadharmaning balu inucap patut :
  - a. Ngamanggehang patibrata tan kengin ngamargiang paradara/drati krama ;
  - b. Nguasayang waris pagunakaya, tan dados ngadol, ngadeang, makidihan lan siosan punika, sajawaning kebebasang olih pianak utawi kulawarga pirihi tampek sakeng kurenannya prade piana kantong alit-alit ;
  - c. Kengin ngidih sentana prade wenten pidabdab sadurung sinalih tinggil padem, saha kabebasan olih kulawarga sakeng kaparusa ;
  - d. Kawentenang mawiwaha malih, prade wenten kebebasang manut angka/aksara ring ajeng.

### Pawos 59

Balu kaucap tan pageh sakadi ring sor :

- a. Dratikrama utawi paradara ;
- b. Matilar saking pakubon tan pasadok jantos 6 (enam) sasih ;
- c. Lempas ring swadharma sewosan-sewosan, tan prasida ngesihin solah maprawerti arep ring pituduh sane patut sakeng kulawarga purusa.

### Palet 3

#### Indik Sentana

### Pawos 60

- (1) Sentana wenten kalih pawos, sane kaucap pratisentana miwah sentana paperasan;
- (2) Pretisentana ingih punika sentana sane metu saking pawiwahan kapatut ;
- (3) Prade pawiwahan tan kapatut ngawetuang sentana, magda tan kantong kawastanin babinjat utawi astra patut kamanggala antuk panyangaskara;
- (4) Prade pawiwahan tan ngawetuang sentana kengin ngidih sentana antuk upasaksi sakala niskala sane kawastanin sentana papemeras ;

(5) Sentana .....

- (5) Sentana rajeg inggih punika ngawetuang sentana kengin ngidih sentana antuk upasaksi sekala niskala sane kawastanin sentana pamerasan ;
- (6) Sang sane dados kaarsayang sentana rajeg inicap wiwit angka (5), inggih punika :
  - a. Pratisentana wadon tunggal ;
  - b. Sampun kemanggehang dados pratisentana lanang (purusa) ;
  - c. Kapawiwahan kaceburin kautamayang antuk jadmā sane maagama Hindu utawi jadmā sane maagam siyosan sane sampun ngalaksana yang pamarisuda raga utawi sudiwidani ;
  - d. Sane ngemanggehang sentana rajeg patut mapesadok ring Prajuru Banjar, tur I Klian Banjar patut nyobyahang ring Banjar saha nganturang ring Prajuru Desa Adat.

#### Pawos 61

- (1) Ngangkat sentana manut dudonan patut makacihna arta berana pamerasan sane kesaksiang sakala-niskala ;
- (2) Sapa sira ugi krama pacang ngidih sentana patut masadok ring Bendesa sanistana 3 (tigang) sasih sedereng pemerasan ;
- (3) Bendesa kawakilin olih Klian-klian Banjar nyobahang ring sawidangan Desa, sang sapa sira ugi rumaksa tan liia mangda nyadokang masengker kalih uku (14 rahina) sabanen pemerasan ring Bandesa Adat ;
- (4) Prajuru/Dulu Desa digelis mawosin saha ngicening pamutus nepek ring catur dresta miwah pararem ;
- (5) Prade sulur paperasan tan manut kadi kecap ring ajeng, Prajuru/Dulun Desa wenang ngadeg sang pemerasan saha ngicening pamutus mangda kapuputang riyin babawos, sulur utawi wicaranya.

#### Pawos 62

- (1) Paperasan, sane kaputut ring Desa risampun makacihna :
  - a. Widi-widana paperasan ;
  - b. Kasaksinin olih prajuru Desa sane makelingang utawi ngilikitayang.
  - c. Kasobyahang ring wawidangan Desane.
- (2) Sane kapatut peras angga sentana kadi ring sor :
  - a. Jatma maagama Hindu ;
  - b. Paperahan nedunang saking sang meras ;

c. Kulawarsa .....

- c. Kulawarga saking purusa, prade tan wenten kengin sakeng wadon, yening taler tan wenten wawu kangin sakama-kama (saking kayun) ;
  - d. Kautamayang saking waris pancer kapurusa ;
  - e. Sinalih tunggil mawiwit saking kulawarga tunggal sanggah utawi merajan, paibon lan dadia utawi ngambilin anak tios sakewenten sang maagama Hindu.
- (3) Kengin ngangkat sentana langkungan ring adiri, lanang wiadin wadon.

#### Palet 4

#### Indik Warisan

#### Pawos 63

- (1) Warisan inggih punika tetamian artha berana saha ayah-ayah ngupadi kasukertan sakala lan niskala saking kaluhurannya arep ring turunannya.
- (2) Kang sinanggech warisan luwire :
  - a. Duwe tengah, makadi tegal, ayahan Desa, Kahyangan, Pusaka Siwa, pakarana lan sapanunggalannya ;
  - b. Pamerajan ;
  - c. Pagunakayan, tadtadan/jiwa dana, hutang piutang.
- (3) Wawu kengin kabawos warisan prade wenten :
  - a. Sang mapiturun (Pewaris) ;
  - b. Katurunan (ahli waris) ;
  - c. Artha berana miwah tategenan makacihna Warisan.

#### Pawos 64

- (1) Ahli waris luwire :
  - a. Pratisentana purusa ;
  - b. Pratisentana pradana (sentana rajeg) ;
  - c. Sentana peperasan lanang/wadon.
- (2) Prade tan wenten sekadi ring ajeng, kang sinanggech ahli waris :
  - a. Turunan purusa pernah ngunggahang, rerama lanang, pekak selantur ipun misan, mindon ;
  - b. Turunan purusa pernah kasamping makadi kaponakan misan, mindon.

Pawos 65 .....

### Pawos 65

Swadharmaning ahli waris patut :

- a. Nerima saha nguwasayang tetamian pahan saking kaluhurannya, makadi ngarempon sanggah, Pura saha pengupakaranya miwah nyelidihinin ayah-ayahan pawaris ;
- b. Nawurin hutang-hutang pawaris sane manut peangeloika.

### Pawos 66

Pangepahan waris manut sakadi ring sor :

- a. Risampun kalaksanayang Pitra yadnya lan hutang-hutang pawaris tuntas ketawur ;
- b. Para ahli waris polih pahan pada sangkaning pagunakayan, sajabaning karang/tegal, ayahan Desa kaamong olih ahli waris kang sinanggeh Krama ngarep ;
- c. Sinalih tunggil waris kengin tan polih pahan prade ;
  - 1) Nilar kawintan lan sasaning Agama ;
  - 2) Sentana rajeg kesah mawiwaha utawi pratisentana nyeburin, soang-soang kabawos ninggal katon.
- d. Boya ahli waris kengin muponin hasil manut dudonan luwire ;
  - 1) Sentana luh selami dereng kesah mwiwaha utawi tan alpaka guru, miwah prade madrebe pianak tan keangkenin olih wong tua rare inucap, kengin ngawaris wantah pikolih pagunakaya sentana luh inucap kemawon ;
  - 2) Balu luh wiadin wiadin muani nyeburin (soang-soang boya sentana) ;
  - 3) Mulih daha utawi taruna, riantukan ring pawiwahane pecak sampun ringgal katon.
- e. Pawaris kengin maweweh rikala maurip pianak jiwa dana, tadtadan/bekel, makacihna paweweh tetep ring pianak sane kesah mawiwaha.

### Pawos 67

- (1) Prade sejeroning pakulawargan wenten ahli waris langkungan ring adiri patut ;
  - a. Kawentenang paigum indik pedum waris inucap ;
  - b. Yen tan prasida katunasang tatimbang ring Prajuru (kerta Desa) ;
  - c. Prade taler tan wenten cumpu ring panepasan Kerta Desa, kengin katumusang ring Sang Rumawos.

(2) Prade .....

- (2) Prade karang inucap kaputungan, patut Prajuru/Dulu-dulu nibakang ring :
  - a. Sang sinanggeh ahli waris manut pawos 64 ;
  - b. Sang kengin anggen anggen sentana manut pawos 62 (2) miwah (3) ;
  - c. Prade taler tan wenten cumpu ring panepas Kerta Desa, kengin katumusang ring Sang Rumawos.
- (3) Prade jantos karang Desa kaepah utawi kasepih, patut soang-soang nedunin Desa Marep.

**SARGA VI  
WICARA LAN PAMIDANDA**

**Palet 1  
Indik Wicara**

Pawos 68

- (1) Sane wenang mawosin makadi mutusang wicara ring Desa inggih punika Prajuru/Dulu Desa sinanggeh Kerta Desa.
- (2) Prade sang mawicaratan wentan cumpu ring pamutus Kerta Desa, kengin nunasang wicara inucap ring sang Rumawos.

Pawos 69

- (1) Sahanan wicara mawiwit kacorahan saka luwire sinanggeh nungkasin daging Awig-awig, pararem miwah paswaran Desa/Banjar, Prajuru/Dulu patut digelis mawosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring Catur Dresta.

**Palet 2  
Indik Pamidanda**

Pawos 70

- (1) Desa/Banjar wenang niwakang panidanda ring warga Desa/Banjar sanc sisip.
- (2) Paniwak inucap kalaksanayang olih Bendesa/Klian Banjar

(3) Bacakan .....

- (3) Bacakan pamidanda luwire :
  - a. Ayahan panukun kesisipan ;
  - b. Danda arta ;
  - c. Kanorayang ;
  - d. Panyangaskara.
- (4) Pamidanda sane katiwakang patut masor singgih manut ring kasisipane.
- (5) Jinah utawi raja brana pamidanda ngranjing dados druwen Desa/Banjar.

#### Pawos 71

- (1) Krama sane langkungan ring tigang paruman ngalantur tan nawur urunan miwah dadandan wenang karampang.
- (2) Rerampangan ngangge tata cara kadi ring sor :
  - a. Kelaksanayang olih Prajuru kesarengin olih Krama saakcha tigang diri maka saksi ;
  - b. Sang ngarapang sangka'ing darsana ngambil barang utawi nyawenin tanem tuwuh, akehnya manut ring utang sang karampag ;
  - c. Prajuru/Dulu meteketang mangda barang-barang sane karampag digelis katebus, masenger awuku (7 rahina) ring kutus rahinane pacang kaadol ;
  - d. Tan nganinin saluwir barang sane patut inggilang manut Agama miwah tan mademang pangupa jiwa sang karampang.

#### Pawos 72

- (1) Prade sang pacang karampag ngawara (ngalangin) pelaksanaan inucap mawasta sampun tan nganutin Awig-awig Desa wenang karang Desa kagenahin kadaut olih Desane.
- (2) Samalih yen purun taler ngalangin palaksanaan kadi ring ajeng tan wenten pamargi sawawaning kasepekang olih Krama Desane.
- (3) Pamidanda inucap ring ajeng keni buntas risampun sang kakeninin :
  - a. Nunas geng pangampura ring Krama Desa riantukan nguak pasubaya (pararem) pecak ;
  - b. Nawur pangargan penguak pasubayane duk pacang karampag kadulurin pamrayascitta payapsap kaiwangane ring Desa.

Sarga VII ....

SARGA VII  
NGUWAH-NGUWAHIN AWIG-AWIG

Pawos 73

- (1) Nguwah-ngwahin Awig-awig Desa puniki kalaksanayang ring paruman Desa.
- (2) Awig-awig puniki kamargiang ngawit kaingkupin (kararemin).

Pawos 74

- (1) Sakaluwiring sane wenten saderengnya patut kanutang ring sedaging Awig-awig punika.
- (2) Sakaluwiring sane durung kabawos sajeroning Awig-awig punika patut kalaksanayang manut tata cara sane sampun mamargi kadulurin antuk pararem-pararem.

SARGA VIII  
PAMUPUT

Pawos 75

- (1) Awig-awig puniki kareremin duk rahina : Budha Kliwon Wuku Gumbreg sasih Sadha Isaka 1923 tanggal 28 Juni 2000 ring wantilan Desa Adat Gelogor.

LUWIR SANG NGALINGGA - TANGANIN

I. Bendesa Adat



I MADE GULAWAN

II. Kelihan Banjar



I. WAYAN GUNAWAN

SAKSI - SAKSI

Kepala Desa Lodunduh



DRS. I WAYAN BUDIARTHA


Camat Ubud



DRS. IDA BAGUS NGURAH GEDE

Mengetahui dan telah dicatatkan

Pada tanggal : 31 Agustus 2001  
Nomor : 20 Tahun 2001



BUPATI GIANYAR  
BUJOKORDA GDE BUDI SURYAWAN, SH.